



Äntwert vum Minister fir auswäerteg Ugeleeënheeten an Aussenhandel Xavier Bettel op parlamentaresch Fro n°1970 vum 25 Februar 2025 vum honorabelen Deputéierte Sven Clement

Ad 1)

De Minister huet d'Sanktiounen net blockéiert. Déi noutwendeg juristesche Texter waren zum Moment vum Conseil affaires étrangères (CAE) vum 24 Februar 2025 nach guer net prett. Während dem CAE haten d'Ministeren eng politesch Diskussioun. Lëtzebuerg huet déi aktuell regional Mediationsefforten encouragéiert a virgeschloen d'Resultater vun dese Vermëttlungsbemeiungen an den EU Diskussiounen ze berücksichtegen. Spezifesch goung et em eng Ministérielle tëschent der Communauté de développement de l'Afrique australe (SADC) an der Communauté d'Afrique de l'est (EAC) déi zu Harare geplangt war fir kuerz nom CAE (awer bis elo nach net stattfonnt huet.) Eng politesch an diplomatesch Léisung kann nëmme vun de regionalen Acteuren an de Konfliktparteie selwer kommen. De Prozess vun der Sanktiounsvirbereedung leeft weider op europäeschem Niveau. D'Adoptioun ass fir de Moment fir de CAE vum 17. Mäerz 2025 virgesinn.

Ad 2)

Lëtzebuerg ënnerstëtzt d'Sanktiounen, déi am Kontext vun de Mënscherechtsverletzungen am Ost-Kongo vun der EU preparéiert ginn, an dofir stellt sech d'Fro vun enger Inkohärenz, sou wéi déi den honorabelen Deputéierten se beschreift, net.

Ad 3)

Och des Fro stellt sech net, well Lëtzebuerg huet keng Sanktiounen géint de Ruanda blockéiert. D'Virbereedung vun europäeschen Sanktiounen leeft weider.

D'HRVP Kaja Kallas huet op hirer Pressekonferenz direkt nom CAE d'Diskussioun vum Conseil resuméiert a Referenz op de politeschen Accord gemaach deen et ënnert de 27 EU Memberstaaten op der Fro vun de Sanktiounen gëtt.

Ad 4)

Wéi d'Statec Datë weisen, läit de Volume vum Handel a Wueren a Services tëscht Lëtzebuerg a Ruanda bei 4,7 Milliounen Euro. De Ruanda läit domat op der 154. Plaz op der Welt wat eisen Handel ugeet. Laut Statec-Prognose schéngt provisoresch Zuele fir den Handel a Wueren a Services fir d'Joer 2024 e Réckgang vu 54% ze weisen.

Déi wirtschaftlech Bezéiungen tëscht dem Ruanda a Lëtzebuerg sinn also marginal. Se spille keng Roll an de politesche Konsideratiounen vum Minister. D'Kooperatioun tëscht de Finanzzentren ass zwar ee wichtegt Element vun der Lëtzebuerger Kooperatioun am Ruanda, ee Projet deen iwwert déi klassesch Entwécklungs-Hëllef ewech innovéiert andeem en nei Partner mat u Bord hält an ee reellen Echange vun Expertise an Experienz férdert, mee och dee Projet stellt just ee klengen Deel an de globale Kooperatiouns-Bezéiungen tëscht dem Ruanda a Lëtzebuerg duer.



Ad 5)

D'Mënscherecht- a Sécherheetskris am Oste vun der demokratescher Republik Kongo ass déif besuergneserregend an d'Gewalt géint Zivilisten an d'humanitär Konsequenze sinn inakzeptabel. Lëtzebuerg fuerdert de Schutz vun de Zivilisten an de Respekt vum internationalen humanitäre Recht, besonnesch a Hibleck op di erschreckend genderspezifesch Gewalt. Lëtzebuerg engagéiert sech fir eng kohärent an eenheetlech europäesch Positioun, déi erlaben, soll, Drock op all Bedeelegt vum Konflikt auszeüben an schéckt domadder e kloert Signal géint déi schwéier Verstéiss géint d'Mënscherechter. De Representant Spécial vun der EU fir d'Grands Lacs, dee rezent d'Regioun besicht huet, huet a sengen Echangen zu Kigali an zu Kinshasa d'EU Positioun och nach eng Kéier kloer widdersholt.

Luxembourg, den 12 Mäerz 2025

Minister fir auswäerteg Ugeleeënheeten an
Aussenhandel
(s.) Xavier Bettel